


中國古典文學基本叢書

中華書局



楊萬里集箋校

第八冊

中國古典文學基本叢書

楊萬里集箋校

第八冊

中華書局

楊萬里集箋校卷一〇六

本卷所收，爲書簡，起慶元四年（一一九八）癸丑，迄五年己未，家居作。

尺牘

答贛州彭郎中〔一〕

某伏以小至將臨，清霜寒霽。即日恭惟判府郎中尊契丈：期年報政，惠化川流。民咏天相，台候動止萬福，玉嫺受社山則。某老日益侵，病日益加。閑冷之迹，姓名不敢自達於通貴之前。四方人事，皆已掃影。今茲陽復令辰，君子道長。有如台座，心所起敬，亦不克奏記爲踐長之賀。蓋昇沉異勢，其理然也。不謂台慈，折節岳牧之尊，篤契章布之舊，遣騎損誨，訪問生死。鈴齋名酒，分餉野夫，以暖其長。饒廩黃獨之寒，以勞其散；薪糲白石之苦，攝衣下拜。黍谷春生，中心藏之，多言何謝！一衣帶水，無從伏謁。

金玉是身。筆橐就列，日夜惟此之禱。

【箋證】

〔一〕贛州彭郎中，即彭演。宋會要輯稿職官七三之二四：「慶元四年正月二十七日，新除尚左郎官彭演寢罷，差知贛州。」本書卷五九有回贛州守新除廣帥彭子山郎中啓。卷七六章貢道院記：「慶元五年，前尹直秘閣郎中、三山彭公改帥五羊。」本書卷四〇送彭子山提刑郎中赴召詩箋證已詳考其名籍事歷。右書有「期年報政」語，當作於慶元四年冬。

答廬陵劉縣丞〔二〕

某伏奉誨帖，以小春絕品分似野人。烹玉塵，試春色，心知韻，舌知腴。第恐春風，不慣腐儒湯餅腸耳。一笑，占謝不既，悚仄悚仄。

【箋證】

〔一〕劉縣丞，慶元間曾傳達朱熹與誠齋往來書信，疑爲建安劉琪諸孫。本書卷三八送廬陵丞劉約

之詩云：「忠顯聞孫定不虛，西樞猶子故應殊。……晦翁若問誠齋叟，上下千峰不要扶。」此詩箋證考定劉縣丞約之名學博，爲建安劉珙之弟劉珣之子，朱熹之晚輩。詩作於慶元五年夏，應即劉學博任廬陵縣丞之時也。

與湖南運使陳郎中〔一〕

某伏以小春良辰，新寒氣肅。即日恭惟都運直閣郎中：玉節倚天，忠誠貫日，百城蒙惠，三神孚休^①。台候動止萬福。某敬拜手奏，記徹姓名於繫人，仰惟財幸。

某也愚不肖，顧獨有落落心事，吐之則誰聽？不吐則不釋。「開卷闔且想，千載若相期。」茲非退之之詩乎？「士或日接膝而不知知，或異世而相慕。」茲非退之之語乎？某之與執事，同生於今，而謂之異世，謂之千載，可乎不可也。繫執事以又玄之學，不世之文，一戰文闈，萬人奪氣。有司驚目^②，收異科，策高足，偃名藩，冠望郎，陞延閣，持英蕩，豈弟於州，忠慨於朝，風采於一路。厥今談者，言當世之名勝，必曰陳公焉。

某老病之身，不中世用，棄官八年，請老四祀。撥襖乎西疇之煙雨，零簪乎南礪之水月。獨不得與嶽麓之猿鶴，橘洲之鷗鷺，一望執事之聲光。以某之想慕，知退之之想慕。

想而不見，慕而不釋，不於執事乎吐之，將於何吐之？尺一且下，紅藥紫薇，仁公之歸，自此愈遠矣，臨風慨然。

【校】

①「休」，四庫本作「體」。汲古閣本同原本。

②「驚」，四庫本作「即」。汲古閣本同原本。

【箋證】

〔一〕湖南運使陳郎中，右書叙陳氏事歷，有執事以「又玄之學，不世之文，一戰文闈，萬人奪氣。有司驚目，收異科，策高足，偃名藩，冠望郎，陞延閣，持英蕩」諸語，查淳熙紹熙以來，以科第出身而爲所謂「望郎」即吏部郎中者，惟陳傅良、陳宏規二人。陳傅良於紹熙元年除湖南轉運官，改浙西提刑，過闕，留爲吏部員外郎。見止齋集卷末所附蔡幼學撰行狀。慶元間以僞學禁錮七八年之久，慶元六年適正家居，與右文自稱「棄官八年，請老四祀」即作於慶元六年者不符。而陳宏規，永樂大典卷三一五陳字韵引清漳志：「陳宏規字獻可，龍溪人。登乾道丙戌第，以軍器監丞出知潮州，就除廣東倉，召爲吏部郎。歷官至朝請大夫，奏請子及孫，皆以尉終。父雄卿，人稱爲長者，有金網性理說、圓覺經說行於世，贈朝議大夫。」查廣東通志卷二六，陳宏規知潮州

爲慶元元年事，慶元三年除廣東提舉常平。則其入朝爲吏部郎似應在慶元四年以後，然清漳志未載其後仕歷，不知其是否即止於此，若陳氏此後以直秘閣除湖南運判，則在慶元六年，與右書并無不合，因疑右文之陳郎中，或即陳宏規，蓋此外別無他人可與此相符合者矣。

又

某惶恐再拜，敬問台閣玉燧。即日恭惟尊尊幼幼，受祉山則。有廬陵委，願奉教條。某惶恐白事：中男承務郎衡州安仁監稅務次公，筮仕云初，百事墻面。孤寒伶俜之迹，所望於上官。收恤其尺寸，而脫略其罪戾。睠其始而全其終，百穀之仰膏雨，厦屋之幪震風，舍執事疇依者？

【箋證】

〔一〕中男承務郎衡州安仁監稅務次公，筮仕云初，本書卷三九有送次公子之官安仁監稅詩，次於慶元六年底諸詩間，而此後又有同次公觀細陂小坐行店詩，顯與送行詩爲錯簡。卷四〇有次公滿物來歸偶上巳寒食同日父子小酌詩，爲嘉泰二年春作，因疑次公赴任爲慶元五年事，本書卷

一〇九答蕭國博書：「中男次公去秋之官雁峰。」書爲慶元六年作。則右書亦必慶元六年作也。

與衡州陸知府（一）

某伏以良月行冬，初寒以雨。即辰恭惟判府太中：填撫大維，歸若天柱。民謳豈弟，天迪忠嘉，台候動止萬福。某謹盼飾不腆之書，自徹於涓人謁者之伍。仰惟財幸。

某竊嘗洞視今古大夫之家，有能擅勛名之場，泝儒學之源，登文章之錄，世濟其美，嬋嫣相踵，有陸氏若者乎？無也。若遜、抗在吳，若機、雲在晉，若德明、敬輿在唐，皆人中龍也。孰謂古有其人，而今未有乎？執事英妙之年，拔奇收科，玉映潢臺。德明之儒學，機、雲之文章，蓋魯國之寶玉大弓，黃梅之夜半衣鉢，皆家傳之自得，而不問外人者也。遜、抗、敬輿之勛名，天下方有望焉。衡山之雲，綠淨之波，豈真能苛留者？一州之福，將均宏之於天下。公卿闕而選所表，寵渥徵黃，誕真禁近，其不遐矣。

某也山林野人，已抽手板付丞相矣。安得一覲當世之勝流，以一洗其胸中之侂跂

乎？敬賦草蟲之三章，以寄此心。

【箋證】

〔一〕衡州陸知府，永樂大典卷八六四七衡字韵引衡州府志知州題名：「陸律，朝請大夫，慶元四年八月到，六年十月滿。」雍正浙江通志卷一二五：「紹興三十年庚辰梁克家榜：陸律，西安人。」右書當作於慶元五年冬。

〔二〕草蟲三章，誠齋爲陸氏所賦草蟲詩，本書失收，已無可考。

又

某惶恐再拜，僭越敬問，台閤玉嫺。即日恭惟尊尊幼幼，受祉山則。廬陵有可效老聃之役者，唯命是聽。某惶恐白事：中男次公，筮仕有俸，百事墻面。今官衡之安仁監稅，正隸大府之下邑。遂得仰事高牙大纛之光塵，充太史之牛馬走，豈無涓埃，收之恤之？豈無罪戾，燾之免之？不勝舐犢之情。不敢自蔽，而瀆聞於大君子之聽，不勝主臣。

答權桂陽軍斛通判〔一〕

某伏以良月行冬，初寒帶雨。即日恭惟權府府判太中：設監最課，假守兼官，二境宜民，三神隲祉，台候動止萬福。某敬上記以謝，書禮報況，一再之辱。未見君子，願言珍重，立俟春風玉笋之除。

某屬者專走家僮，修敬樹門之隸人。迺承諸臺遴賢，兼刺鄰府。春仁秋威，洽於二邦。在彼願其爲真，在此願其終惠。疊是最狀，於以上聞。外陟使華，裏翔郎署，在此行矣。

某中男次公，效官有俚，百事墻面。適有天幸，得我鄉先生而依賴焉。未趨府庭，而薦口已徹於五馬，至於假材官而六之，使不徒行以抵官下，不貲之恩，盡室永懷。東坡與王定國書云：「我兒即公兒也。」敢一請再請不一請而已也，惟終惠之。

【箋證】

〔一〕權桂陽軍斛通判，即斛僖。益國文忠公集卷七十二參議董君昌裔墓志銘（慶元五年）：「君

諱昌裔，字夢貺，廬陵郡著姓。……五女：長適迪功郎宜州宜山縣尉高筠，……次適朝散郎通判衡州斛僖。」萬曆新修南昌府志卷一三豐城令：「淳熙十五年，斛僖，文林郎。」本書卷一三二宋故朝請郎賀州斛使君墓銘：「賀州斛使君諱僖，字公和，一字宗魯。……丞衡陽，郡有部使者二臺與太守，而三君中立不倚，皆蒙其知。常平使者李公楫薦以所知，祥刑使者陸公世良薦以廉吏，吏部尚書劉公德秀薦以公正聰明。桂陽缺守，漕檄君攝之。郡小而寡，君痛省檣，去日有羨。郡介蠻洞，無城無兵。君募驍勇，繕幹甲，訓技擊，軍聲載振，羣蠻遠遁。漕使陳公研薦君可二千石，得臨賀。」按：所云攝桂陽，蓋以桂陽軍通判攝知軍也。其事則在慶元六年。

與湖南黃提舉〔一〕

某伏以維孟之冬，亦小之春，即日恭惟提舉太中：一節星臨，百城霜凜。民氣嘉樂，神天給扶，台候動止萬福。某敬齋心奏記，司鉛槧者，仰惟財幸。

【箋證】

〔一〕湖南黃提舉，即黃衡。永樂大典卷八六四七衡字韵引衡州府志湖南提舉題名：「黃衡，朝散

大夫，慶元五年十一月到，嘉泰二年三月除直華文閣奉祠。南宋館閣錄卷八正字乾道以後：「黃衡字平國，建安人，李易榜進士出身，治禮記。六年四月除，八年十月通判邵武軍。」右書當作於慶元六年春。

又

謝

某恭聞皇上顧憂元元，遜在湖山之外，其欲安安，如在畿甸之內。於是疇咨宰臣，涓選膚使。如西周皇華之五章，如東京臨遣之八人者，惟提舉太中，以豫章棟榦之材，商瑚周璉之器，繁星五緯之望，百千人中，褒然舉首^①。仁風先春，義氣後秋。鶯鶯舞歌，奸貪瑟縮，何其盛也！何其盛也！使事有指，顧此耿中丞之一職，豈鬱鬱久居者？鷄翹豹尾之間，尚多虛位，非執事是待而誰待也？

某棄官八年，請老四祀，孤雲野鶴之與儔，桃花流水之爲釣。仰名流之芳風，瞻使星之末光。可思而不可忘，可望而不可見，寸心耿耿，安得傾豁？抑許穆夫人之詩不云乎：「百爾所思，不如我所之。」引領南雲，惘惘款款。

【校】

①「衰」，原誤作「褒」，汲古閣本誤作「哀」，今據四庫本改。

又

某惶恐再拜，敬問台閥玉眷，即日恭惟尊尊幼幼，受祉無央。有廬陵委，命戒唯唯。某惶恐白事：中男承務郎監安仁縣稅務次公，筮仕云初，百事牆面。今以蚍蜉蟻子之微，而仰事動搖山嶽之威，是震是栗，敢九頓首以請。儻或辱許效其十駕，而遍覆之以二天，使得竊五斗以活其孥，仁人不報之恩，寒士不貲之福，繫門下是估。

與湖南陸提刑〔一〕

某伏以即辰大冬初寒，小春猶燠。恭惟提刑太中：出節少府，訓夏祥刑。百城觀風，三神錫羨，台候動止萬福。某敢恭奉記，演告主書，仰惟財幸①。

某竊惟祥刑使者，千古未聞，蓋肇自章聖皇帝咸平四年閏五月，始有開封斷獄覆奏

之詔。七月，始有諸路并置提點刑獄官之詔^②。於是殿中丞李湘，首膺荆湖南路之選。聖聖繼繼此職，增重於部使者之中，命曰職司。今提刑太中，一代人物之英，三朝德業之望。偃藩持節，聲光蔚然，斗柄垂天，慶雲拂日，何以尚之。結絲而侍禁廷，聽履而上星辰，人猶遲之。而原隰載驅於彼沅湘^③，將非今聖上欽恤，亦如選李湘之意耶？「使事指綉衣，春當霄漢立。」某方賡少陵此詩，以賀班公登仙之行也。

某老病野人，棄官八年，請老四載。講聞嶽峻川流之盛名，而獨無路以望見其末光。一生遺恨，孰弘於此？寄聲修好，吁已後矣。仰惟高明，洞視心曲云。

【校】

①「某敢恭奉記瀆告主書仰惟財幸」，四庫本、汲古閣本俱闕。

②「七月始有諸路并置提點刑獄官之詔」，原本闕，據汲古閣本、四庫本補。

③「沅湘」，汲古閣本、四庫本俱作「丞相」。

【箋證】

〔一〕湖南陸提刑，疑即陸律，蓋陸氏知衡州任滿，乃就除湖南提刑。湖南憲司治所在衡州。右書有「偃藩持節」語，即指此而言。右書又有「棄官八年」語，知必作於慶元六年底或嘉泰元年春。

又

某惶恐再拜，敬問台閔玉嫺，即日恭惟尊禪蒙福姪兆。有廬陵之役，敬請指縱。某惶恐白事：中男承務郎監衡州安仁稅務次公，筮仕云初，百事墻面。天假之幸，迺遇今日之陸先生，修收孤寒而主後進，如退之所作行難之篇者。寬其鞭箠而有其簡書，使得餉，於是以餬其口，此非人皆有之天，此真我獨有之天也。嚮風歸依，有萬其望。

安仁涂知縣〔二〕

某伏以即日良月初寒，恭惟判縣中大，佳政宜民，自天孚佑，台候動止萬福。某謹上記下隸，伏惟財幸。

【箋證】

〔一〕安仁，涂知縣，安仁縣，爲湖南衡州所屬。涂知縣無考。康熙衡州府志卷一〇僅載宋安仁縣令三人，無涂氏名，知佚失已久。涂之爲姓，益國文忠公集卷五四撫州登科題序載：「本朝最重儒科，臨川圖志載題名記一卷，起太平興國五年樂史而下，至淳熙七年姓名具焉。今州學教授富沙劉垺將增廣刻之石，使來者可繼。而郡人太學博士王克勤、士子涂公達見屬題辭。……公達之先，由元祐至今登科者十餘人。二君於此惓惓，故嘉其志，并及之。嘉泰二年二月旦。」不知涂知縣與撫州涂氏家族有關否。

又

某幸奉瑶林瓊樹之輝光，歲月湍奔，至於照人風度，可思而不可忘者，了了在目，望望在心，旦晝往來於懷也。執事之才之邵，大其施，則宜簞鵲驚之行，小而却，亦合當麾節之寄，顧尚淹恤於鳴琴製錦之地，何也？然學道愛人之聲，與湘水俱流。下轉上聞，自密縣而超拜，何知非福？某中男次公，筮仕之始，百事墻面。適得事其大夫之賢者，豈非幸歟？惟故人高誼，必有以訓其所未能，而葆其所不逮者。使得銜於是而璧之

或全，舍執事何適矣！

送俞憲羊麵〔二〕

某伏自道途相傳，玉節光華，將照臨先人之敝廬，日掃花徑以俟東來之紫氣。惟是荒村，去城差遠，山厨土鏗，索然不給於鮮。遣人賒市，喚婦自饌，豈不夙夜！然高牙虛徐，而日昃食乾矣。一易再易，則亦如之，偵伺之久，倉猝之頃，不免效荷蓀之殺鷄，盧氏之烹鴨，溪毛野簍，此固不足以羞於王公者。不腆乘壺，羊腔麵碩，敢贅諸行厨，惟洞視其禮不足而敬有餘，不穀而揮之，有萬其幸。

【箋證】

〔一〕俞憲，即俞澈，字子清，吳興人，曾知筠州，與誠齋交代。見本書卷五四回筠州交代俞守寺正啓箋證。本書卷七六章貢道院記：「慶元五年……皇上命祥刑使者雷川俞公兼領府事。」